

Iniziativa per distgargiar las famiglias


Animada debatta en il cussegl naziunal

DA LUCAS DEPLAZES / ANR

■ **Cun ina iniziativa dal pievel vul la pcd distgargiar las famiglias. En la debatta dal cussegl naziunal ha l'iniziativa chattà gronda simpatia da tuttas varts, dentant pauc sustegn politic. La pcd ha cumbatti suletta per la chaussa.** Cun ina iniziativa dal pievel inoltrada il mais da november 2012 cun 118 000 sottascripziuns pretenda la Partida cristiandemocratica da la Svizra (pcd) da liberar da la taglia ils supplements per uffants e per la scolaiziun da quels. La cumissiun predeliberanta propona cun 19 cunter 4 vuschs ed ina abstenziun da refusar l'iniziativa e da sutmetter quella al suveran senza ina cuntraproposta. Tenor la giudicaiziun da la cumissiun disponan confederaziun e chantuns gia uss da plirs instruments per sustegnair las famiglias. La presidenta da la cumissiun *Kathrin Bertschy* (pvl/BE) ha fatg attent a las sperditas fiscalas per la confederaziun da var 200 milliuns francs e da 760 milliuns per ils chantuns. L'iniziativa na cuntogna dentant naginas propostas co che quellas sperditas da var ina milliarda francs l'onn duain vegnir cumpensadas. Ina ulteriura menda saja che l'iniziativa favuriseschia las famiglias bainstantas. La cumissiun ha dentant acceptà in postulat che incumbensescha il cussegl federal d'examinar co che las famiglias cun uffants pudessan vegnir sustegnidas.

Uffants èn il fundament da noss stadi

Christophe Darbellay (pcd/VS) fa attent che l'iniziativa duaia rinforzar las famiglias en relaziuns finanzialas mesaunas. Gist las famiglias da la classa mesauna èn savens en ina situaziun precara e basegnan sustegn finanziel da la cuminanza. Savens saja la naschientscha d'in uffant in ristg finanziel. Calculaziuns han demussà ch'in uffant



En la debatta dal cussegl naziunal ha l'iniziativa da la pcd per distgargiar las famiglias procurà per bler palpieri ha era chattà gronda simpatia da tuttas varts, dentant pauc sustegn politic.

KEYSTONE

costa var 1000 francs il mais. Ord quest motiv stoppia la capaciad da cumpra da las famiglias vegnir augmentada. Darbellay ha deplorà ch'il parlament burgais saja pli svelto pront da conceder reduziuns da taglia a las interpresas che a las famiglias.

Martin Candinas (pcd/GR) fa attent a la gronda muntada da las famiglias per l'avegnir da la Svizra. Las famiglias cun uffants muntan il fundament da nossa cuminanza e quai sto restar. Ord quest motiv duain ils supplements per las famiglias restar cumplainamain a disposiziun da las famiglias. Gist ils ultims onns han purtà grondas chargias per las famiglias cun uffants, sco l'augment dals pretschs per l'ac-

quist da l'atgna chasa u abitaziun, l'augment dals tschains-chasa, da las premias per las cassas da malsaus e per programs dal temps liber. Gia il fundar famiglia munta ina sminuaziun da la capaciad da cumpra da var 40%. L'iniziativa da la pcd portia avantatgs per mintga famiglia, ha punctuà Candinas.

Nagut auter che bels plets

Philipp Müller (pld/AG) fa attent che la mesadad da las famiglias cun uffants na pajan gia oz nagina taglia. Tut quellas na pudessan betg profitar. La pld refusa uschebain l'iniziativa sco il postulat da la cumissiun. *Beat Jans* (pss/BL) criticgescha il fatg che la mesadad da las

famiglias cun entradas modestas na possia betg profitar e declera che la pss refusia l'iniziativa. *Hansjörg Hassler* (pbd/GR) fa attent che las famiglias sajan vegnidas distgargiadas ils ultims onns essenzialmain e menziuna ils supplements unificgads da 200 resp. 250 francs per scadin uffant, las deduziuns sin la taglia per la tgira d'uffants tras terzas persunas. Da l'iniziativa profitassan principalmain las famiglias en bunas relaziuns finanzialas.

Per la fin da redacziun ha pir la mesadad dals passa 40 pledaders pudì s'exprimer. En il cussegl naziunal ha l'iniziativa da la pcd nagina schanza. Il pievel vegn bain ad avair il davos pled en chaussa.